

求恕齋
叢書

雪橋詩話三集

三

I207
447

全宋詩卷一百一十一

雪橋詩話三集卷第三

遼陽楊鍾義撰集

吳興劉承幹參校

濱州張宣儀陸膠州趙泰牲鹿友皆與趙飴山同年進士儀陸知鳳陽斃大猾鹿友知金華精察平恕皆良吏而無子飴山爲作二哀詩儀陸述懷云字良每煦煦鋤惡亦斷斷敢屈骨鯁姿博取眉宇盼神君之頌有自來矣

吳戢山司空秉謙家世山陰從龍隸漢軍於留村爲從孫行尊人靜菴先與徐滄浮善遂令受業其門靜菴夙

證禪悟庭幃雍肅滄浮寄戢山詩所謂入室傳經舊趨
庭佩訓頻完知聞道日益重服官身也以中書官水曹
康熙丙寅四月 聖祖御乾清宮親策試羣臣千有餘
員戢山擢置高第篤師友之誼滄浮表兄趙南浦卒於
都門遣使歸其遺骨嘗治水下河從征塞外自吏部出
守東萊洊至卿貳滄浮子詩鈔十卷其所校訂也

李武曾有鷓鴣怨三首爲曹澹餘作也序云李子夢聞
鷓鴣聲醒而作詩遂以名篇懷渠丘公也詩云山川何
處險乃在西南陲劒鋌互崩劣羊腸自委蛇鷓鴣一小
鳥其聲如有知荒荒雲木暗聽者生嗟咨美人昔同車

攬袂前相持但歌行路難詎識別離時瘴雨方毒淫一朝限天涯年華同逝水會合未有期平生苦憶往髣髴夢見之鷓鴣忽告我聲較昔年悲亦知行不得醒淚如懸絲鷓鴣飛以南鴻雁飛以北相逢願有違彼固非儔匹冥冥豈不懷天長來矰弋纏烽蜚煙紫洗兵蠻雨黑鍛羽亮所甘需時或良策稻粱今滿地秋風埽荆棘江河多故羣引吭長相憶寄聲擇木心努力當舉色鷓鴣爾勿悲我怨殊未央王路直如矢何爲隔巖疆下看江浩浩仰視天蒼蒼颼風橫南來惡木蔽春陽香草獨無依采折隨路傍終知非故土素意不相忘託跡危疑間

誰能喻中腸皇天感德澤零露迴嚴霜榮悴固有時毋
使根株傷澹餘出撫貴州引武曾爲助旣聞三藩同撤
知亂將作遂力辭歸旣抵家而雲貴告變澹餘陷賊此
詩蓋深惜之

論詩絕句爲多論文者較少李武曾論文口號云涇渭
分明各有區文人相謔定何如晉江纔入南豐室又道
毘陵得緒餘青浦移家愛掩扉遺書晚出爲官微琅琊
詎是妄庸子垂老元知少作非吳儂不解絳雲編佳句
先從綺麗傳錦瑟香奩各有託自將新製比當年抔土
從知砥柱難故裁險句作波瀾樊家舊體銷亡盡何事

重教注釋看歐蕪韓易詆碑銘哆口淵源是六經記得
尚書三語在請君試擬弔由靈于一文章在人口暮年
蕭瑟轉欻歔琵琶一足荒唐甚留補齊諧志怪書斗酒
千言觀者驚商邱才思劇縱橫人間不識侯公子地下
修文老更成神龍朱鳳委泥沙翡翠蘭苕且自誇不信
文章千古事過江今有百名家攜來佳麗乞新詞和者
千人汝弗疑卻笑桃根與桃葉王家迎後不題詩先是
商邱侯方域南昌王猷定皆以所撰古文鏤版於浙武
曾覽之終篇曰是不難遂期朱竹垞共作古文沿流溯
源於明取王子充方希直王伯安唐應德王道思歸熙

甫於元取戴帥初虞伯生揭曼碩陳眾仲吳正傳吳立
夫黃晉卿又羅當代之文甄綜爲一集曰文緯

汪荅文贈喬石林詩千古文章自有真波瀾如此不無
神老夫今夜掀髯笑垂死纔能見替人杯闌燭跋月將
中細與論文興不窮從此兒曹爭企腳瓣香遙指射陂
東輕薄爲文哂未休典刑何意近韓歐縱饒前輩風流
在也放斯人出一頭石林孫億劍谿說詩記侍讀公在
史館嘗以列傳就荅文先生索指授先生公同年友於
意不爲可輒塗竄未嘗以少貸一夕酒半公及之先生
詞色甚厲眾艱然公意愈下繼此而請業如初及公議

下河罷歸先生已退老吳下八九年矣更挾所爲文造
堯峰以請先生讀而歎曰今海內文章我之外唯汝他
如潘次耕尙堪把筆亟命嗣君出拜以他日墓誌屬公
未幾相繼而歿云云石林以文字處友朋間虛受如此
劍谿又言方望谿嘗以讀邸鄘十一變風讀王風二篇
示座客固屬摘疵眾皆援左國秦漢人爲讚說億徐進
曰先生此文殊不近人尙覺永叔子瞻氣象未穆也先
生曰莫是疵否余於八家意主不似少閒又曰與其後
世有違言不若當世有違言尙可改正先生古文當今
無輩且性簡傲而論文獨虛懷於晚進如此記此二事

以見前輩虛心絕無護短憑愚之習

彭羨門稱李丹壑詩蘊藉深秀於語言文字外超然獨
絕徐勝力謂近代言詩李何稱首仲默十五舉鄉書十
九成進士獻吉得第之歲亦甫盈二十丹壑成童取科
第入仕六年始及弱冠蓋較飴山贊善年尤少其詩計
年爲一冊早冬寄懷戚緩耳聞中云別業在猶上誅茅
淮水頭半肩頻道路孤寺歷冬秋有酒朗吟費無錢家
計愁最憐書咄咄夢裏說封侯方欣同日夕何遂追風
塵頓念送殘臘那堪違故人銜杯白門柳驅馬黃河春
王貢情何限南瞻淚滿巾地遠仙霞險懷深易水長尺

書憑楚雁歸鬢染吳霜曼倩嗟求米相如倦客梁暮雲
重回首萍寄感參商衡軌三年共聲華五嶽齊未能逐
軒冕祇自把鉏耜歲月消黃卷恩波望紫泥何時策高
駕翦燭話幽棲緩耳明府聲華黯淡投贈之作僅見斯
集費此度謂丹壑所席居者極一時之榮遇不以人地
自矜貴時有湖山蕭然之致發之於詩者清癯而內瑩
蓋其胸次如此也

李丹壑送戴田有歸桐山舊隱云雪白蘭薰久絕倫每
輕榮祿厭風塵偶然囊卻孤琴去眞與龍眠作主人移
竹尋梅計不疏雙桐門徑七松居白楊齋室青楊巷日

把花經讀道書南湖波接太湖平四面青山三面城他
日相思戴安道不辭雪後刺船行江南夫子無雙士何
遂翛然事隱棲多恐秦僧論骨相未容閒處聽黃鸝田
有當康熙時與望谿方氏才譽相次長被文字之禍抵
法禁諸家集中遂罕見其姓字其後桐城戴氏爲古文
者稱存莊孝廉游方植之之門

丹壑太湖山詩河勢作之字迂迴難信風時或急篙櫓
亦復勞孤蓬雜樹數十里處處港汊通不意太湖山蒼
翠落眼中午日已照頂雲雨猶迷濛共此一峰岫陰晴
殊未同漁洋謂其善寫難狀之景村行卽目云四野牛

羊時有笛一村桃李晝無人定州道中雜書云谿風濯
足泉聲裏午夢肩輿樹影中亦皆工於卽目

海寧沈寅工文學亮采號山鐙貧老蠖屈游京師年且
六十無所遇吾鄉李梅崖中丞一見心異之出領井陘
攜之官署遂從梅崖講聲律之學晨鐘夜篝老而虛受
不兩年以風疾卒未卒三日猶挑鐙坐譚不倦梅崖哭
以詩六章有靈前一點書鐙在不似前宵對讀明之句
經紀其喪惠存其女千里歸櫬以詩人題其墓葉蒼巖
之楚過恆山復爲索誌墓之文焉其篤於友誼若此延
陵之劍歐陽頤之金紀瞻之營護孤寡不是過矣康熙

癸亥 聖祖臨幸五臺爲民祈福山徑逼仄不能受輿
梅崖刊山堙谷去險卽平以通輦路勞費倍常等跋履
營度十八日而告成有臺山日記詩冊蒼巖謂其紀行
諸篇興寄深遠當與潘岳西征張績南征二賦並傳非
徒康樂始興之游山居之賦也老輩政學兩優不以新
資替乃幽賞世俗以吏治文懷不能並美者徒見其才
短耳

遼陽劉中丞漢祚以國子司成隨 世祖定鼎燕京從
范文肅薦授河間守厯官閩撫王衡按察其孫也康熙
己卯監浙闈試魏水村吳寶厓皆與執經之列爲序葛

莊詩鈔稱門下士丁亥南巡時官淮北僉事蒙垂問中
丞舊事因賜舊德貽謀顏額其家居在京師西山地名
棗林士人善釀酒名竹葉青秋風詩所謂秋風忽動葦
蘆興竹葉青當熟棗林也晚歸詩云未須學種邵平瓜
隨意山頭更水涯興到漫同雲出岫晚來好共月還家
忽然明滅村村火不定飛鳴樹樹雅試叩柴門人已寢
可能清夢結煙霞

康熙辛酉嚴蓀友典試山右張洎谷以麟經爲所特拔
有歌苦知希殊勞拂拭之語魏環極稱爲得人戊寅洎
谷視嵯長蘆蓀友至津贈五百金自敘謂舊例引規旣

不敢辭親友來游者簿記之至八百餘人念與爾鄰里鄉黨之義各稱量予之里中人不能遠涉比戶寄之釘一冊曰天祿均霑洎谷令太和時革去編審心紅清操拔俗座客有謂其爲陳仲子者解嘲句云須是能廉充蚓類留將清白在天涯觀其取予之間與有意要作好官知有已而不知有人者異矣

喬石林善畫嘗爲棠村相國作蕉林書屋圖康熙壬戌粵西補行鄉試石林偕楊秋曹佐國往典試事有使粵日記一卷謂自西平至確山田荒蕪不治彌望皆黃茅白葦豺虎出沒其中村落皆成穢墟詢之士人言明季

流賊煽亂屠戮殆盡今戶口稀徭役重居者且多逃亡
逃者能復業乎因念汝南爲天下之腹水甘土沃旣不
若西北斥鹵嶢峴之地又不若巴蜀僻處一隅承平四
十年而千村萬落尙付蒿萊留心國計民生者所宜動
念也其碓山道中詩中州天下腹厥田異斥鹵如何南
汝間千里餘曠土道詢九十翁涕出語未吐流寇昔煽
亂中原競鼙鼓殺戮兼流亡千百存四五村落人絕稀
城市屋可數荒山相經亘白日仗弓弩余意殊不然汝
等逢 聖主賜租更發粟修文況偃武牛種亦易致旱
澇非所苦休養四十年胡不治場圃老翁淚縱橫斯理